

## **Inatsisartut Suleriaasissaannut siunnersuut** (Siulittaasoqarfik)

### **Saqqummiussissut**

Suleriaatsimut nutaamut siunnersuutikkut matumuuna saqqummiunneqartukkut inatsisartuni isumaqatigiinniarnert suli eqaannerusumik akimmisaarfeqannginerusumillu ingerlanneqartalernissaat siulittaasoqarfiup anguniarpaa.

Suleriaasissaq atuuttoq 1999-imi kingullermik annertunerusumik nutarterneqarnermi kingorna kissaatit piunasaqaatillu takkuttut malillugit ingerlaavartumik iluarsineqartarlunilu allanngortinneqartarsimavoq.

Taamanikkulli ingerlaavartumik assigiinngitsunik iluarsineqartarlunilu allannguuteqartinneqartarsimavoq, ilaatigut piffissat oqaaseqarfiusinnaasut pillugit, ilaat suleriaatsip pisariillisarneqarnissaa pillugu allallu aamma assersuutigalugu tunniussinissamut piffissarititaasut ataatsimiinnerillu aallartittarnissaat pillugit. Maannamulli allanngortitsinerit ima amerlatigilersimapput pissusissamisoortutut isigineqarsimalluni taakku tamarmik suleriaatsimi nutaarluinnarmi katersorneqarpata.

Suleriaatsip atuuttup tungaviumik inatsisartut naalakkersuisullu pillugit inatsisartut inatsisaat soorunami aallaavigaa. Pissutsit taamaannerat Namminersornerup eqqunneqarnerata kingorna soorunami suli atuuppoq. Tamatumunnga atatillugu siulittaasoqarfik isumaqarpoq pissusissamisuunngitsoq Inatsisartut suliassaminnik ingerlatsinerat pillugu malittarisassat sukumiinerusut inatsisini pingaarnerni, ass. Inatsisartut Naalakkersuisullu pillugit inatsimmi, aalajangersarneqarpata. Malittarisassat Inatsisartut namminneq iluminni suliassaannut tunngasut inatsisitulli ingerlaavartumik allanngortinneqarsinnaasariaqarput, naak aamma suleriaatsip inatsisitut iluseqarluni akuersissutigineqartarnissaa piunasaqaataagaluartoq.

Naalakkersuisut aamma taama isumaqarput. Siorna Namminersornerup eqqunneqarneratigut Inatsisartut Naalakkersuisullu pillugit inatsimmi nutaamik pisariaqartitsisoqalerpoq, pissaanerit marluk, inatsisiliortussaataatut atuutsitsisussaataasullu, akornanni inatsimmi erseqqissumik immikkoortitsineq annerusumik sammineqarluni. Tamatuma malitsigisaanik inatsimmit nutaamit aalajangersakkat assigiinngitsut peerneqarsimapput suleriaasissamullu nuunneqarlutik, soorlu aamma aalajangersakkat ilaat siusinnerusukkut inatsimmi suleriaatsimilu ataatsikkut allassimasut, maannakkut suleriaasissatut siunnersuummi taamaallaat ingerlateqqinneqarlutik.

Inatsisartut Naalakkersuisullu pillugit inatsisissatut siunnersuummi allanngortitsineq tamanna aamma isumaqarpoq Inatsisartut siunissami suleriaatsiminni kiffaanngissuseqarnerullutik allanngortitsarsinnaalernissaat inatsimmi aalajangersakkap taamaaqataa allanngortinngikkaluarlugu.

Suleriaasissamut nutaamut siunnersuut pillugu annerusumik oqaaseqassanngilanga, siunnersuummulli nassuiaatit innersuussutigissallugit, tassani aamma sukkasuumik

takuneqarsinnaammat qanoq annertutigisumik Inatsisartut Naalakkersuisullu pillugit inatsimmit atuuttumit aalajangersakkanik atuuttunik nuussisoqarsimanersoq.

Inatsisartuni suliarisartakkavut eqqarsaatigalugit siunnersuutigineqarpoq Aningaasaqarnermut aamma Kukkunersiuinermut Ataatsimiititaliat siunissami upernaakkut ataatsimiinnermi qinerneqartalissatut ilaasortat ukiakkut suliassaminnik ingerlatsisinnaanissaminnut piffissaqarluaqqullugit, soorlu aamma Kalaallit Nunaata folketingimut ilaasortaataat naalagaaffiup inatsisaani tungaviusunik isiginiagassat pissutigalugit siunissami pisussaaffilerneqarsinnaassanngitsut nunanut allanut sillimaniarnermullu ataatsimiititaliap ataatsimiinnerinut peqataasarnissamut.

Siulittaasoqarfiup siunnersuutigaa oqaasiinnarmik saqqummiunneqarsinnaasunik Naalakkersuisunut apeqquteqarsinnaanermik periarfissaq atorunnaarsinneqassasoq. Tamatumunnga taarsiullugu siunniunneqarpoq siunnersuuteqartumut, Naalakkersuisunut oqaaseqartunullu, minnerunngitsumik inaarutaasumik oqaaseqartoqarneranut atatillugu, ilassutitut apeqquteqarsinnaanermut akissuteqarsinnaanermullu periarfissat ataatsimut isigalugu amerlineqassasut. Taamaattumik aamma ukioq manna upernaakkut ataatsimiinnermi allartittumik piffissat oqaaseqarfusinnaasut sivikippallaarnerannik isornartorsiuisarsimanerit annertuumik tusaaniarneqarsimapput.

Taamaaliornikkut eqqarsaataavoq Inatsisartuni sulinerup akimmisaarfeqannginnerulernissaa, taamatullu aamma minnerunngitsumik oqaluuserisassat ataasiakkaat suliarineqarnerini uummaarinnerusumik oqalliseriaatsip ammaanpeqarnissaa.

Taamaalillunga taamatut oqaaseqarlunga suleriaasissamut siunnersuut Inatsisartut ilaasortanut oqallisigisassanngortippara.